



## Suns Europe: a Udin il miôr de musiche e des arts tes lenghis minoritariis

*Ducj i events in program dai 29 di Novembar ai 2 di Dicembar*

**Suns Europe**, in program **dai 29 di Novembar ai 2 di Dicembar**, al è rivât ae sô cuarte edizion cul fin di promovi lis produzionis artistichis contemporaniis intes lenghis minorizadis europeanis par sostignî la costruzion di une Europe diferente, unide inte diversitàt, fondade sui dirits, sul pluralism, sul rispjet e su la colaborazion. Cheste manifestazion, che si conferme il principâl Festival european tal contâ e fâ cognossi lis lenghis minorizadis, e je un progjet de **cooperative Informazion Furlane** cu la poie finanziarie de **ARLeF - Agenzie Regjonâl pe Lenghe Furlane**, de **Regjon Autonome FVJ**, dal **Comun di Udin** e de **Fondazion Friuli** e e gjolt dal Patrocini dal Consei de Europe e di NPLD - Network to Promote Linguistic Diversity.

Il **concerton**, anime de manifestazion, **sabide il 1n di Dicembar, des 21, al Teatri Gnûf Giovanni da Udine**, al maravearà il public intune sere fate di musiche, divertiment e colôr parcè che Suns Europe nol è un festival di folclôr, ma une manifestazion zovine e vivarose. A lâ sù sul palc, dongje dai parons di cjase dal Friûl (Luna e un Quarto), a saran artiscj che a vegnin dal Cjanton dai Grisons, dai Païs Catalans, ma ancje de minorance svedese de Finlande, e po dopo de Galizie, dal Païs Basc, dal Gales, de Basse Sassonie e de Ladinie. **I biliets a son disponibilii su vivaticket.it o intai ponts di vendite autorizâts.**

**Lis novitàs** - I dîs dal Festival a son cuatri e lis ambientazions svariadis: in plui dal Teatron, il Yardie di Pradaman (ai 29/11, des 21) dulà che si tignarà la fieste di benvignût; i teatris di Orsarie e di Cormons, e l'auditorium di Listize (ducj i trê ai 30/11, aes 21) animâts di concerti; la librarie Tarantola di Udin (il 1n di Dicembar aes 18) che

e ospitarà l'incuintri 'Contâ dissegnâ scrivi', cui vincidôrs dal Premi San Simon 2018.

Confermade 'Scuele Europe': une lezion-conciert, volude a fuart de ARLeF e dedicate aes scuelis secundariis furlanis dulà che si fevelarà di dirits, Europe e diversitàt linguistiche. Altre grande novitàt di cheste edizion e je la zornade di domenie ai 2 di Dicembar che si davuelzarà al Teatri San Giorgio di Udin, li che des 14.30 e sarà la proiezion di documentaris furlans, cors, catalans, bascs. Dopo di un pocje di musiche dal vîf, il festival si sierarà (aes 21) cul spetacul teatrâl targât TSU - Teatro Sosta Urbana, 'Donald dal Tiliment'.

"Suns Europe al è un unicum a nivel european, il pont di riferiment plui significatîf de produzion artistiche siore in lenghe minoritarie. Un festival - al declare **William Cisilino, diretôr de ARLeF** - che o vin contribuît a ideâ e che o sostignin fintremai de prime edizion, parcè che al puarte in Friûl dute la ricjece e la vivarositât espressive che e nas de diversitàt des culturis di minorance, fasint dal nestri teritori une plateforme di incuintri e di confront di identitâts, sensibilitâts e ideis diferentis. Clamant dongje i miôr talents artistics, che a presentin la lôr produzion plui resinte, Suns Europe al è la dimostrazion concrete dai valôrs dal plurilinguism e di trop che lis tantis lenghis minoritariis che si fevelin in Europe a pandin viertidure e modernitàt."

Program e info su [www.sunseurope.com](http://www.sunseurope.com) e su la pagine FB 'SUNS Europe'.

